



Kamis, 11 April 2024

Ogen: Habakuk 2:1-4



Suratken si ipetangkas Tuhan



Lantai bo asing man banta kerna surat. Surat e me sarana informasi tertulis si ilakoken sada pihak guna nehken sada informasi, pesan, berita man pihak sideban. Tentuna labo kerina seri isi surat sabap sie kerina tergantung kai nuate si man pesehenken. Emaka mbue erbagena jenis surat. Lit surat cinta, lit surat resmi, lit surat keputusan, lit surat perintah, rsd.

Habakuk selaku suruh-suruhan Tuhan megati kal erkeluh kesah ntah pe jungut-jungut man Tuhan erkiteken uga bangsa sideban kejam kal perbahanenNa man bangsa Israel. Emaka mbue kal kata "uga maka" arah Habakuk nari man Tuhan, nungkun man Tuhan, engkai maka pelepas Tuhan bangsa sideban kejam kal man bangsa Tuhan e.

Kedungenna ijabap Tuhan me keluh kesah Habakuk enda alu nuruh ia gelah isuratken i bas papan batu kai si ipetangkas Tuhan man bana. Maka berita, pesan arah surat enda eme: *"kalak jahat labo puluh, tapi kalak bujur la banci lang nggeluh erkiteken tetap ia ernalem man Dibata"*. Arah pesan enda ate Dibata ngatakensa maka proses kiniseran si inanami bangsa Israel i bas itindas bangsa Babilon jadi sada pendidiken ras pengajaren man bangsa e gelah mulihken kempak Dibata ras jera i bas salah ras dosana. Mulih lah ku identitas semula selaku bangsa pilihan Dibata si ndalenken kebenaran, kebijuren ras keadilan. Ibahan Tuhan sada surat gelah si enda pagi ioge bangsa e guna jadi pesan man bana, maka Tuhan tetap nimai bangsaNa mulihken kempak kebijuren ras kebenaran. Lenga pe jadi sendah tapi paksana pasti reh, aminna pe melawen. Bagem Tuhan e tetap setia nimai anak-anak si ikelengiNa guna mulih kempak Ia, si tetap ernalem man baNa.

Lit pepatah ngatakan maka: *"Allah itu terlalu baik untuk tidak bermurah hati. Allah itu selalu bijaksana untuk menjadi bingung. Ketika aku tidak bisa melacak tangan-Nya (mengerti perbuatan Tuhan), aku selalu dapat mempercayai hati-Nya."*